

陶
山
集
一





陶 山 集

(一)

陸 佃 撰

本館據聚珍版叢
書本排印初編各
叢書僅有此本

陶山集目錄

卷一

五言古詩一首

七言古詩三首

五言律詩十五首

五言排律詩一首

七言律詩三十八首

卷二

七言律詩七十八首

卷三

七言律詩六十三首

五言絕句四首

七言絕句二十一首

卷四

劉子十三首

狀八首

卷五

議二首

卷六

議四首

卷七

表二十首

卷八

表三十二首

卷九

經解四首

卷十

制二十六首

卷十一

敍論一首

記四首

卷十二

書六首

卷十三

啓二十九首

策一首

策問十二首

序四首

書後二首

祝文十一首

祭文六首

卷十四

誌銘九首

卷十五

誌銘十六首

卷十六

誌銘七首

墓表三首

行狀二首

臣等謹案陶山集。宋陸佃撰。佃字農師。山陰人。熙寧三年。廷試甲科。徽宗朝。官至吏部尙書。拜尙書右丞。出知亳州。卒。事迹具宋史本傳。所著有爾雅新義。埤雅及此集。埤雅。別著錄經部小學類中。爾雅新義。世無傳本。惟永樂大典尙載之。而訛缺斷爛。殆不可讀。此集據書錄解題本二十卷。亦久散佚。今以永樂大典所載。哀爲十六卷。蓋僅存十之七八矣。佃本受學王安石。故埤雅及爾雅新義。多宗字說。而新法之議。獨斷斷與安石爭。後竟入元祐黨籍。安石之沒。佃在金陵。爲文祭之。推崇頗過。然但敍師友淵源。而無一字及國政。元祐初。預修神宗實錄。亦頗爲安石諱。數與史官辯爭。坐是外補。及徽宗初。召還復用。佃乃欲參用元祐舊人。復與時宰齟齬而罷。蓋其初誤從安石遊。文字之間。不能不有所假借。至于事關國計。則毅然不以私廢公。亦可謂剛直有守者矣。佃旣以新法忤安石。不復咨以政事。惟以經術任之。神宗命詳郊廟禮文。佃實主其議。今集中所

載諸篇是也。其他文字。勘以史傳所紀。亦皆相符。惟元豐大裘議。集稱佃爲集賢校理。史乃稱同列。皆侍從。佃獨以光祿丞居其間。未免傳訛。又佃紹聖初落職。知泰州。故到任謝表。有海陵善地。淮南近州語。史稱知秦州。亦爲字誤。殆修宋史時。其集已不甚顯歟。方回瀛奎律髓。稱胡宿與佃詩格相似。宿詩傳者稍多。佃詩則不概見。今攷永樂大典所載。尙有二百餘首。大抵與宿並以七言近體見長。故回云然耶。厥後佃之孫游。以詩鳴于南宋。與尤袤。楊萬里。范成大。並稱。亦喜作七言近體。家學淵源。殆亦有所自來矣。乾隆四十一年六月恭校上。

總纂官侍讀學士臣陸錫熊

侍講學士臣紀昀

纂修官修撰臣陳初哲

陶山集卷一

宋 陸 佃 撰

五言古詩

依韻和毅夫新栽梅花

誰賦梅花詩。擬繼三百五。昔聞林居士。幽棲賁巖塢。瓊章雖在人。玉樹已埋土。湖山今寂寥。五雲護無雨。夫君擅文章。頗以詩自許。芬芳春草生。光芒夜珠吐。人間再生島。名在詩書圃。錦囊貯西施。佳麗生百賦。翺翔道家山。文采動人主。陽春定能和。白華應可補。後生誰敢當。柏直口尙乳。（案）漢書高帝紀。問大將誰也。與。此詩節取成句。原本訛柏直爲相值。今校正。老夫幸未疲。腰劍猶能舞。

七言古詩

贈王君儀

嘗思孔子昔在世。門生弟子三千人。大哉卷舒聖人道。弦歌講誦鄒魯濱。立身非以利欲誘。至誠惟學義與仁。雍容德藝愈磨厲。烜赫光輝彌日新。追廬力行慕汲汲。忘疲善誘思循循。外榮豈就卿相位。內樂惟知探道真。所以萬世作師法。望之仰之如北辰。吾嘗苦愛孟子語。淵源事業醇乎醇。得君達欲善天下。陋

巷窮惟周一身。當時舉世謂迂闊。進退何妨吾屈伸。紛紛流俗何足託。以道優游能自適。營然顧彼萬鍾祿。有如聚散空中雲。乃知君子所爲學。志將憂道不憂貧。君儀建德一儒士。篤學滄溟陶粹純。年強有志關邪說。氣壯力苦鋤荆榛。放出森森梓杞材。秀枝爛漫敷青春。讀書侵暮卽然燭。爲文夜坐常達晨。誰憫顏瓢啖藜藿。自憐范甌生埃塵。每云外物未嘗恤。披卷動能經累旬。有時揮筆瀉霖雨。但聞霹靂飛車輪。雲開霧散卻晴霽。清風淅淅無纖塵。〔案〕此句用韻與前複。佳花美木競妍秀。高山遠岫皆嶙峋。有時高談傾耳聽。又如天馬超崑崙。回顧驚駘百千輩。疲筋竭力安可羣。我嗟才識頑且鄙。書齋日得相依親。勤勤顧子能如此。固宜使人長書紳。

依韻和孫勉教授

汝陰先生學雖興。官職冷靜真如冰。門前烏雀可羅網。甌中埃墨隨炊蒸。收拾人才妙長養。落筆雖誤猶成蠅。至于敗羣亦不受。畫脂徒費知難凝。從來說詳富學海。發揮春秋破曉暝。仲舒玉杯足瑕類。中散珠船不光彩。〔原註〕中散謂王徽之。著書固知非一日。作詩又欲重千載。公卿爭迎爲上客。信知淮楚文章伯。應許曹參避正堂。未甘賈誼虛前席。男兒富貴固有時。如何宦達微愆期。衰衣繡裳畢竟在。祇是卽今髭鬢改。平生耿介性不容。凜凜勁節凌秋風。金華中丞最稱賞。惜也未老先龍鍾。去人闔棺命云促。浮生瞬息風中燭。〔原註〕華老尤稱重誠之。華萼飄零不得歸。涕淚數行悲手足。顧予未放雪滿顛。乞得清潁如升仙。喜聞故人在學校。宛若見面初開牋。揚州騎鶴未足羨。便欲共醉花中間。西湖風景事事好。不似吳越惟無山。海棠方恨我

來遲。君欲歸去將何之。期向聖時同盡瘁。況復交情淡如水。他年若和〔原註〕傳說。免使鹽梅鼎顛趾。

依韻和李知剛黃安見示

蔣山鱗鬣蒼嵯峨。參伐可捫斗可摩。建康開府占形勝。千櫓萬舳來江艘。憶昨司空駐千騎。與人傾蓋腸無他。有時偃蹇枕書臥。忽地起走仍吟哦。諸生橫經飽餘論。宛若茂草生陵阿。發揮形聲解奇字。豈但晚學池中鵝。余初聞風裹糧走。願就秦扁醫沈疴。登堂一見便稱許。暴之秋陽濯江沱。夜深歸來學舍冷。鼓吹有蛙更聞鼃。曾參捉襟肘屢見。回也簞食傾瓢蠡。誰云寒儒偶遭遇。馳道馬疾搖鳴珂。因緣乞郡得金印。關吏雖識難誰何。邇來二紀世已換。仙槎一局真爛柯。孔林父子久同葬。謝安墩在空坡陀。顧瞻思賢有饑象。挂壁未去聊隨梭。中年觸緒易感慨。賴有二子相經過。隴西家兒信奇偉。美玉在巖珠在波。慙非冰清託之女。亭亭松柏垂蘿。黃生初來似蠶蠋。被絲纏裹今成蛾。磨礪爪距擅場屋。擬與羣俊爭殊科。惟黃與李豈易得。一二自抵三千多。回思爭雄六戰國。競致賓客尋干戈。黃金築臺禮郭隗。玉盤進手延荆軻。雞鳴狗盜何足數。雖欲定霸終蹉跎。大哉皇宋聖人出。日月雙麗君臣和。歲時金穰玉燭潤。紀功泰山崖可磨。平生慷慨慕荆國。自誓中立無邪頗。異時與子共勳業。請效夔契廣堯歌。

五言律詩

登塔

題寫看前輩。躋攀接後塵。日邊窺兩觀。雲下念雙親。宮綫徐添畫。林花頓減春。夕陽猶獨立。萬慮入經綸。
依韻和彭器資直講

歲久親談麈。春深集試闌。才名非畫餅。科等是傳衣。鶯稍遷喬出。鴉應反哺飛。羨君親膝近。昨夜夢先歸。
呈張遼明舍人

世掌絲綸美。聲名壯紫微。賜茶天上坐。退食日邊歸。簡在除書密。時清諫疏稀。仁公參鼎席。寰海望餘輝。
思巖老呈彭器資

春遠下樓遲。城高背落暉。鵲鴿經歲別。鴻鴈幾時歸。柳闊行人盡。花殘驛使稀。濠州在雲下。深欲伴歸飛。
寄龔深父給事

往歲手曾攜。穿雲路欲迷。蓬萊風引近。靈鷲月飛低。畫永茶相對。春深鳥自啼。別來真約在。何事少書題。
蘇丞相挽歌詞二首

樂易雖難老。艱難亦備更。高官誰不死。厚德是平生。曾負阿衡鼎。仍調傅說羹。須知夷險異。高臥看南行。
世德層層外。年齡九九餘。浪傳千歲字。真記五車書。帳冷閒金鴨。泉深暗玉魚。前時傳巖像。今得幾分如。
鍾評事挽歌詞

銀餅當年遇。金鉤幾代收。一經知教子。千橘等封侯。瘴雨松門夕。悲風桂嶺秋。江深人不見。依舊水東流。
馮朝奉挽歌詞

仕宦惟遭遇。神仙信杳冥。老年多感慨。同榜半凋零。附葬銘旌暗。平生信史青。須知玉川子。傳後有添丁。

公議郎中挽歌詞

愷悌雖平進。艱難亦備更。冰廳諳冷宦。夢境過浮生。雲海仙舟隔。風旌粉字橫。莫埋言行錄。留著後人行。

劉大卿挽歌詞

許國丹心壯。傳家素節清。葬無金碗送。庭有玉棺迎。紅幕賓朋散。青囊宅兆成。惟餘原上月。猶是舊時明。

陳夫人挽歌詞

鄰與鄒人卜。門歸太史評。忽隨雙佩失。不見一珠成。夢入清都杳。船維彼岸輕。空餘江上月。依舊度牂明。

魏國大夫人陳氏挽歌詞

漏逐晨鐘盡。舟隨暮壑移。文歸大家傳。行在小星時。珠珮臨江失。金丹渡海遲。侍郎頭已白。兒慕不勝悲。

贈慈覺大師

講花天散墜。醉草客爭收。明月來相識。孤雲學自由。隙曠穿薄暮。簷溜滴高秋。不鎖西牕夢。名山有舊遊。

贈李柔得道士

傳得真人性。長安久卜居。曉成西蜀雨。換得右軍書。(原註)一作桂林無雜樹。鳳樓有餘蔬。酒散顛狂極。香消寂寞餘。更能盤礴畫。傳寫十分如。

五言排律

再用前韻呈毅夫

〔案〕此所云前韻一首永樂大典缺載

洛陽曾識面。穠下竟論交。久若居蘭室。初如食蔗梢。故非偷姓孔。誰敢僭名郊。作事常師古。當官肯代庖。匪躬期蹇蹇。夷行笑嚶嚶。稷也真堯力。參乎豈桀醜。金樓傳寶構。雜俎當珍肴。講舍推攸止。賓筵絕載嘔。孫臏餘臘雪。徐榻臥寒茭。反舌宵鳴蠅。長蹄暖挂蛸。卽今除戶墮。那得曝簷茅。遠夢方隨蝶。輕綃擬換蛟。歷來雙鳳闕。律動半山坳。草色揉藍染。花名篆字鈔。臆肥熊自撲。香滿麝爭跑。乳雉翔仍集。鳴禽語漸勦。柳將金自比。楮與玉相滑。節應幽三日。陽添泰一爻。碧圓牽翠荇。紅蕾破香苞。鶯出求同志。鴻歸學共胞。形容當舞簫。音韻中笙匏。麗苑聞亡是。熙臺亞有巢。不材真是櫟。何算信如筲。交淡非同醴。流清豈爲膠。往來須倒載。生滅任浮泡。縱阻陳歌管。猶容聽鐃鐃。北牕寧獨臥。南岳謾相嘲。酒用陶巾漉。詩須賀錦包。儘教談麈盡。仍取唾壺敲。不向花前醉。應慙薄荷貓。

七言律詩

閒居示王君儀

五色文章爛錦開。謾勞天女翦刀裁。黃鸞窺水亭亭立。白鳥投空遠遠來。清晝光陰輸靜客。碧雲岐路屬

多才羨君直入文滄海。探盡驪珠始肯迴。

送諸張

就學經年客會稽。父兄應久怪歸遲。故知子學優來日。想得人看勝舊時。食蔗已甘佳境近。爲山纔止素功虧。少年況有修身志。莫爲區區應舉移。

依韻和尚用之秀才梅花二首

假借鉛華素不曾。肯將桃李較衰榮。向人有意如相識。混雪無言恥自明。青帝信音元苦遠。素娥風調不勝清。愛君詩思誠高古。睥睨玄尊與太羹。年年先發更誰曾。憔悴中間獨自榮。素豔得如人淡伫。暗香能共雪分明。銀河魄轉霜風耐。青冢魂歸月夜清。莫與將軍輕止渴。須知丞相要調羹。

送能協

禹門千尺晚登龍。稽古從來緩見功。清節蘊珠函柱白。高文浮蜃吐樓紅。落花正值行時盡。圓月還成別後同。寄字好憑魚上下。汴渠流水洛新通。

呈越州程給事

南海歸來請會稽。錦衣新過浙江西。暫違香案蓬萊小。久擅詩名太華低。花影欲重公事退。鳥聲初闌吏衙齊。雲衢已怪朝天晚。乘興無因訪剡溪。

依韻和程給事留題法雲寺方丈

淨室兼容海衆臨。維摩憔悴病仍侵。且將燈續光明藏。時見珠隨咳嗽音。素壁短碑深招〔原註〕玉。畫簷新榜大書金。故溪曾指桃花記。乘月何時更一尋。去聲

題適南亭呈程給事二首

子真仙去學喬松。華宇經營得我公。海近蓬瀛全髣髴。山經樓閣半虛空。一千里地簷前月。九萬程天座上風。從此鑑中登望好。卻應渾勝水晶宮。參陪初見翳蒿萊。頃刻疎紅戶牖開。賀老湖光浮枕簟。梅家山色染樓臺。翠微已借雲根築。青瑣仍供月影來。聞說紫泥追詔近。使星躔次傍三台。

依韻重和再住法雲寺

〔案〕此云重和。自有初和一首。永樂大典缺載。

聞說重來住法雲。舊緣香火一番新。桃花可認曾移主。鷗鳥還應不避人。腦玉幾陵虹氣勢。領珠長借月精神。何時乞得東南守。共禮黃金丈六身。

贈真戒大師

時訪城西長者家。欲將無定友煙霞。百函貝葉聽揮塵。一炷爐香看點茶。猿立砌臺偷落果。鳥穿簷柏獻新花。舊曾題處煩師護。肯學常流旋碧紗。

登塔望太行

浮圖千尺俯樓臺。天地晴無一點埃。日薄馬初經具次。〔原註〕具茨之山。一從具次。風輕船稍近蓬萊。遷移曾費愚公力。分擘寧煩巨掌開。東北若無丘壘礙。好同靈鷲卻飛來。

依韻和彭器資直講二首

三年清苦下書帷。諸子專門盛一時。研盡錦砂重注易。草殘饒紙謾箋詩。鼓催閩越茶應早。綫引昭陽日漸遲。侍講曾須拌共醉。狀元新約未差池。歸盡春風未得歸。相逢還是落花時。文衡仔細誇程石。飲量麤豪笑滿卮。安穩鴛鴦多左翼。低回烏鵲尙南枝。稍尋前度曾遊處。更覺新懷慰舊思。

依韻和蕭惟申檢法同年

老驥如龍久屈盤。追風消得用金鞍。卽今將相多同勝。自古神仙有法官。病起縱驚秋鬢改。詩成猶伴夜珠寒。他時直上三千里。願看雲天一整翰。

門下王相公南郊謝雪子敏甫學士監禮楊傑有詩次其韻

雪擁平田萬頃寬。一郊和氣屬天官。撒鹽久欲資調鼎。成璧初疑捧上壇。雀帶玉飛金屋煖。龍和珠睡錦牕寒。他年祠罷親陪燕。應得屏風隔坐觀。

依韻和元參政祈雨

翦爪七年矜久旱。齋心三月愧疎雲。地鍾潤澤來耕壠。天借清涼入繡紋。常膳鼎寒搖蕙莆。正衙爐煖和

蘭薰。〔原註〕是日得雨。上復常膳。御正殿。越裳會見朝丹闕。共識中原有聖君。

次韻和曾子固舍人二首

閭闔晨開玉殿浮。靈鼇不動海波柔。是般仙果三千歲。一樣春風四百州。鸞扇影寒裁就月。蜃爐香煖結成樓。從今不顧瑤池宴。閒卻西巡八駿驄。〔原註〕右集英殿春。呈諸同舍。

平明下馬錦蒙鞍。暫向飛廊一整冠。行近柳陰移晷寂。坐來花氣辟春寒。別張翠幄黏絲絮。更想金人捧饌干。洛下少年今亦老。宴遊無復似前歡。〔原註〕右。上巳日。瑞聖園錫宴。呈諸同舍。

寶善堂御筵奉詔送陳資政出守邢州

共輔龍飛與五蛇。一時恩禮有誰加。華堂玉碗更傳酒。便殿金瓶獨賜茶。寶帶光芒腰下印。繡衣形影幕中花。平生自與韓公合。名德應歸太史誇。

呈王聖美

少談奇字客長安。妙斲無人得郢墁。兩鬢已秋陪後進。十年如夢守前官。〔原註〕公改中。九十年矣。竹延西角東須徧。梅發南枝北尙寒。〔原註〕佃先聖美進職。從古晚成終大用。扶搖行見海鵬搏。

依韻和章樞密景靈宮奉安列聖神御

綵輿同日會仙山。金鎖晨開玉殿關。駕象法王趨側畔。騎龍眞祖護中間。紫浮渭北衣冠氣。紅壓終南衮繡顏。更祝聖孫千萬壽。奉祠長御景靈班。